

Protocol Ymgysylltu â'r Cyhoedd Trosolwg a Chraffu Cyngor Sir Ceredigion

Mae'r protocol hwn ar wahân i'r canllaw i gyfranwyr

Mae'r Pwyllgorau Trosolwg a Chraffu yn gorchwyllo gwaith y Cyngor er mwyn sicrhau ei fod yn darparu gwasanaethau yn y ffordd orau bosib, er budd y gymuned leol.

Rôl y Pwyllgorau Trosolwg a Chraffu yw ystyried y gwasanaethau a'r materion sy'n effeithio ar bobl yng Ngheredigion. Mae'r broses hon yn rhoi'r cyfle i'r Cyngorwyr archwilio amrywiol swyddogaethau'r Cyngor, holi sut y gwnaethpwyd penderfyniadau, ystyried dulliau gweithredu ar gyfer gwella gwasanaethau a gwneud argymhellion yn unol â hynny.

Mae craffu'n hanfodol o ran hyrwyddo atebolrwydd, effeithlonrwydd ac effeithiolrwydd wrth i'r Cyngor fynd ati i wneud penderfyniadau a darparu gwasanaethau.

Prif swyddogaethau'r Pwyllgorau Trosolwg a Chraffu yw:

- Galw'r Cabinet a'r Swyddogion i gyfrif ynghylch eu penderfyniadau
- Bod yn 'gyfaill beirniadol', drwy holi sut y gwnaethpwyd penderfyniadau fel bod y bobl sy'n penderfynu yn destun rhwystrau a gwrthbwysau, gan wneud y drefn o benderfynu yn fwy dilys
- Adolygu gwasanaethau a pholisïau'r Cyngor
- Cynnal adolygiadau ar gyfer datblygu gwasanaethau a pholisïau'r Cyngor
- Ystyried unrhyw faterion eraill sy'n effeithio ar y sir
- Sicrhau bod Ceredigion yn perfformio hyd eithaf ei gallu a'i bod yn darparu gwasanaethau o'r radd flaenaf i'w ddinasyddion
- Asesu effaith polisïau'r Cyngor ar gymunedau lleol gan argymhell gwelliannau
- Ymgysylltu â'r cyhoedd i ddatblygu polisïau a gwasanaethau sy'n canolbwyntio ar y dinesydd

Gall trefn effeithiol o Drosolwg a Chraffu arwain at y canlynol:

- Gwell penderfyniadau
- Ffordd well o ddarparu gwasanaethau gan wella perfformiad.

- Trefn gadarn ar gyfer datblygu polisïau sy'n seiliedig ar ymgynghori â'r cyhoedd a mewnbwn arbenigedd annibynnol.
- Gwelliant o ran Democratiaeth, Cynhwysiant, Arweinyddiaeth Gymunedol ac Ymgysylltu
- Ychwanegu haen eglur o dryloywder ac atebolrwydd i brosesau gwleidyddol y Cyngor
- Rhoi cyfle i bob Aelod feithrin sgiliau a gwybodaeth arbenigol a all fod o fudd yn y dyfodol wrth lunio polisïau a monitro perfformiad
- Creu diwylliant o hunan-herio ar sail tystiolaeth

Trefniadau Trosolwg a Chraffu yng Ngheredigion

Mae'r strwythur yn cynnwys 5 Pwyllgor Trosolwg a Chraffu thematig, sef:

| Pwyllgor | Cwmpas |
|-------------------------------|--|
| Y Pwyllgor Cydlynu | Trawsnewid gwasanaethau, cydweithio, gweithio mewn partneriaeth. Bwrdd Gwasanaethau Lleol Ceredigion, Cynllun Integredig Sengl. Diogelu, cyfathrebu, cydraddoldeb a materion sy'n ymwneud â throseddau ac anhrefn |
| Adnoddau Corfforaethol | Gwasanaethau corfforaethol (gan gynnwys adnoddau dynol, gwasanaethau cwsmeriaid, TGCh, rheoli'r trysorlys a gwasanaethau cyfreithiol), Cynhwysiant/Cyfle Cyfartal, Argyfyngau Sifil Posibl, Parhad Busnes, Rheoli Ystadau a Chofrestru Sifil |
| Cymunedau Iachach | Gwasanaethau Cymdeithasol, Gwasanaethau Gofal Integredig, Gwasanaethau Tai, Cyfleusterau Hamdden, Iechyd yr Amgylchedd, Diogelu'r Cyhoedd a Thrwyddedu |
| Cymunedau sy'n Dysgu | Dysgu Gydol Oes, Plant a Phobl Ifanc, Ysgolion, Hyfforddiant, Gwasanaethau Ieuentid a Gwasanaethau Diwylliannol |

| | |
|-----------------------------|--|
| Cymunedau Ffyniannus | Datblygu Economaidd, Adfywio, Twristiaeth, Marchnata, Cymunedau Cryfach, Cymorth Grant Ewropeaidd, Cymorth Busnes, Rhaglen Gyfalaf, Trafnidiaeth a Seilwaith y Priffyrdd, Cynllunio Gwlad a Thref a Chynaliadwyedd. Yr Arfordir a Chefn Gwlad a Gwastraff a Gwasanaethau Bwrdeistrefol eraill |
|-----------------------------|--|

Mae gan y Pwyllgorau Craffu gydbwysedd gwleidyddol er mwyn adlewyrchu cyfansoddiad gwleidyddol y Cyngor cyn belled ag y bo modd.

Er mwyn gweld dyddiadau'r cyfarfodydd hyn, ewch at y rhestr o gyfarfodydd ar y we:

[Cyngor Sir Ceredigion Calendr cyfarfodydd misol - Tachwedd 2023](#)

Mae cofnodion ac agendâu'r Pwyllgorau Trosolwg a Chraffu ar gael drwy ddilyn y ddolen ganlynol:

[Cyngor Sir Ceredigion Strwythur y Pwyllgor](#)

Mae Cyfarfodydd y Pwyllgorau Trosolwg a Chraffu yn agored i'r cyhoedd a chânt eu cynnal yn hybrid - Neuadd Cyngor Ceredigion, Penmorfa, Aberaeron /o bell trwy fideo-gynadledda am 10am. Serch hynny, cânt eu cynnal o bryd i'w gilydd mewn mannau eraill yn ddibynnol ar y pwnc sy'n cael ei graffu. Os oes angen i'r Pwyllgor drafod gwybodaeth gyfrinachol ynghylch eitem benodol ar yr agenda, gofynnir i'r wasg ac aelodau'r cyhoedd adael yr ystafell yn ystod y drafodaeth.

Cyflwyno cais i'r Pwyllgorau Craffu

Er mwyn annog y rheini sy'n byw ac yn gweithio yn y Sir i gymryd rhan fwy blaenllaw yn y broses Graffu yng Ngheredigion, rydym yn annog aelodau'r cyhoedd i awgrymu materion ar gyfer y Pwyllgorau Craffu. Os ydych chi'n dymuno cyflwyno pwnc i'w graffu, mae croeso cynnes i chi gysylltu â ni ac fe gewch chi ymateb gan y Swyddog Trosolwg a Chraffu.

Cysylltwch â ni:

E-bost: scrutiny@ceredigion.gov.uk

Post: Trosolwg a Chraffu
Gwasanaethau Democrataidd
Canolfan Rheidol
Rhodfa Padarn
Llanbadarn Fawr
Aberystwyth
Ceredigion
SY23 3UE

Ffôn: 34878# : 3 ; ; 4

Fel arall, gallwch fynd i wefan Cyngor Sir Ceredigion drwy ddilyn y ddolen ganlynol [Trosolwg a Chraffu - Pwyllgorau - Cyngor Sir Ceredigion](#) a llanw'r **Ffurflen ar bynciau i'w awgrymu a'u hystyried gan Bwyllgor Trosolwg a Chraffu** sydd i'w gweld ar waelod y dudalen.

Y Ddeddfwriaeth

Mae Mesur Llywodraeth Leol (Cymru) 2011 wedi creu amrywiaeth o bwerau a dyletswyddau newydd fel y gall awdurdodau lleol gryfhau democratiaeth leol gan gynyddu ymwybyddiaeth y cyhoedd o'r broses ddemocrataidd leol a'u rhan yn y broses honno.

Mae Adran 62 yn ei gwneud yn ofynnol i awdurdodau lleol roi trefniadau ar waith sy'n galluogi'r holl bersonau sy'n byw neu'n gweithio yn yr ardal i ddwyn i sylw'r pwyllgor trosolwg a chraffu perthnasol eu safbwyntiau ar unrhyw fater sy'n cael ei ystyried gan y pwyllgor.

Mae Adran 62 hefyd yn nodi bod yn rhaid i bwyllgor trosolwg a chraffu roi sylw i unrhyw safbwyntiau a gaiff eu dwyn i'w sylw yn unol â'r trefniadau a wneir o dan yr adran hon.

SUT MAE GWNEUD CAIS I SIARAD YN Y PWYLLGOR?

Gallwch weld Blaenraglenni Gwaith y Pwyllgorau Trosolwg a Chraffu drwy ddilyn y ddolen hon:

[Cyngor Sir Ceredigion Pori cynlluniau gwaith i'r dyfodol](#)

Gan mai dogfen fyw yw hon, dylech gysylltu â'r tîm craffu i sicrhau y bydd yr eitem yn cael ei chyflwyno ar y dyddiad a nodir.

Pe hoffech chi roi eich barn am un o'r eitemau a fydd yn ymddangos ar agendâu'r Pwyllgorau Trosolwg a Chraffu, rhaid i chi gyflwyno cais yn ysgrifenedig i'r Tîm Craffu yn gofyn am yr hawl i siarad cyn gynted ag y bo modd, ddim hwyrach na hanner dydd, dau ddiwrnod gwaith cyn cyfarfod y Pwyllgor. Gallwch anfon y cais ysgrifenedig drwy'r post neu ar e-bost i'r cyfeiriad uchod.

Yn eich cais, dylech gynnwys eich enw a'ch manylion cyswllt, gan gynnwys eich rhif ffôn yn ystod y dydd a'ch e-bost os oes gennych chi un, ynghyd â manylion yr eitem ar yr agenda yr ydych chi'n dymuno cyfrannu ati.

Dylech wedyn esbonio natur eich buddiant a'r cyfraniad yr ydych yn ei gredu y gallech chi ei wneud. Bydd y Swyddog Craffu wedyn yn trafod hyn gyda chadeirydd a/neu is-gadeirydd y Pwyllgor gan esbonio natur y cyfraniad. Os yw'r Cadeirydd o'r farn y gallech chi fel aelod o'r cyhoedd wneud cyfraniad dilys i ddealltwriaeth y Pwyllgor o'r mater dan sylw, bydd yn caniatáu i chi siarad.

Gall aelodau'r cyhoedd hefyd wneud cyfraniad ysgrifenedig os nad ydynt yn medru dod i'r cyfarfod. Yn unol â disgresiwn y Cadeirydd, gellir dosbarthu'r cyfraniadau ymhlith aelodau'r pwyllgor ar ddechrau'r cyfarfod. Ni ddylai'r cyfraniad ysgrifenedig fod yn fwy nag un ochr o bapur A4 a rhaid i'r Swyddog Craffu ei dderbyn 2 ddiwrnod gwaith cyn y cyfarfod.

Cyflwyno Gwybodaeth

Rhaid i'r wybodaeth fod yn berthnasol i fusnes y Pwyllgor Trosolwg a Chraffu dan sylw.

Er mwyn caniatáu amser i bob aelod o'r cyhoedd sy'n dymuno cymryd rhan yn y cyfarfod i siarad, rhoddir 5 munud yr un i bob siaradwr. Rhoddir 30 munud i aelodau'r cyhoedd siarad ym mhob cyfarfod. Os oes mwy o siaradwyr na'r amser a ganiateir, bydd gofyn i aelodau'r cyhoedd enwebu siaradwr ar ran yr achos neu rannu'r amser rhyngddynt.

Bydd gan Gadeirydd y Pwyllgor ddisgresiwn llwyr i ddyfarnu ar faterion o'r fath.

Rôl y Pwyllgorau yw defnyddio arbenigedd a phrofiadau pobl fel y gallant gael gwell dealltwriaeth o'r materion sy'n effeithio ar y Cyngor a phobl Ceredigion.

Rhaid i chi gyflwyno eich hunan i'r Swyddog Craffu 15 munud cyn dechrau'r cyfarfod. Bydd y Swyddog yn medru ateb unrhyw gwestiynau a fydd gennych ac yn gallu dweud wrthy ch lle mae eistedd.

Pan fydd Cadeirydd y Pwyllgor yn eich gwahodd, cewch siarad un waith, am hyd at bum munud. Mae cadw o fewn y bum munud yn hollbwysig. Ni chewch ddsbarthu dim deunydd ysgrifenedig na lluniau oni bai bod y rhain wedi'u cynnwys gyda'r cais ysgrifenedig i'r Swyddog Craffu, dau ddiwrnod gwaith cyn y cyfarfod. Ar ôl siarad, rhaid i chi ganiatáu i'r Pwyllgor drafod y mater, ac ni ddylech ymuno â'r drafodaeth hon. Gall y Cadeirydd ofyn cwestiwn/cwestiynau os bydd angen rhagor o eglurhad ynghylch y pwyntiau a godwyd.

Yr hyn y gallwch ei ddisgwyl

Mae cyfarfodydd fel arfer yn cael eu cynnal yn hybrid - Neuadd Cyngor Ceredigion, Penmorfa, Aberaeron /o bell trwy fideo-gynadledda.

Mae gan bob un o gyfarfodydd y Pwyllgorau agenda ffurfiol a gallwch weld y rhain drwy ddilyn y ddolen ganlynol:

[Cyngor Sir Ceredigion Strwythur y Pwyllgor](#)

Bydd Aelodau'r Pwyllgor yn eistedd o amgylch bwrdd a bydd y cyfranwyr yn rhoi tystiolaeth ac aelodau'r cyhoedd yn darparu gwybodaeth o fwrdd ar wahân neu o bell trwy fideo-gynadledda. Disgwylir i bawb ddefnyddio microffonau fel y gall pawb glywed ei gilydd. Mae'r cyfarfodydd yn mynd yn ôl ac ymlaen rhwng y Gymraeg a'r Saesneg a darperir gwasanaeth cyfieithu ar y pryd ar gyfer y di-Gymraeg.

Darperir seddau hefyd ar gyfer y cyhoedd, y wasg ac unrhyw un arall sy'n bresennol.

Ar ôl i chi gyrraedd, cyflwynwch eich hunan i un o'r staff Craffu a fydd yn medru ateb unrhyw gwestiynau a fydd gennych ac yn gallu dweud wrthyh lle mae eistedd.

Ar ôl y cyfarfod

Bydd y sawl sy'n darparu gwybodaeth yn cael llythyr neu e-bost yn rhoi gwybod iddynt am ganlyniad yr ymchwiliad. Cânt y cyfle i roi adborth ysgrifenedig am y broses graffu y buont yn rhan ohoni.

Ymddygiad mewn Pwyllgor Craffu

Ni ddylai Aelodau'r cyhoedd gamddefnnyddio'r fraint a roddir iddynt o gael cymryd rhan yn y cyfarfod drwy wneud ymosodiadau personol ar Aelodau Etholedig, cyfranogwyr eraill nag aelodau'r cyhoedd. Gofynnir i'r siaradwyr ymateb yn gwrtais i unrhyw gwestiwn oddi wrth Gadeirydd ac Aelodau Etholedig y Pwyllgor.

Bydd yn ofynnol i unrhyw siaradwr sy'n gwneud datganiad, sydd ym marn y Cadeirydd yn ddifenyddol, yn sarhaus, yn gwahaniaethu yn erbyn pobl, neu'n un sydd â chymhelliad hiliol, roi'r gorau i siarad a gadael y cyfarfod. Bydd y Pwyllgor yn cael ei gynghori i anwybyddu sylwadau o'r fath.

Pan fydd nifer o'r siaradwyr yn rhannu'r un farn, efallai y bydd angen pennu llefarydd.

Bydd gan y Cadeirydd ddisgresiwn llawn ynghylch y modd y gall y cyhoedd gyfranogi.

Os na chedwir at yr egwyddorion uchod, gall y Cadeirydd ddod â'r rhan honno o'r cyfarfod i ben.

Cysylltwch â ni ar:

E-bost: scrutiny@ceredigion.gov.uk

Post: Trosolwg a Chraffu
Gwasanaethau Democrataidd
Cyngor Sir Ceredigion
Penmorfa
Aberaeron
Ceredigion
SA46 0PA

Ffôn: 01545 574 177 / 01545 572 044

